

四庫全書

集部

欽定四庫全書

簡齋集卷七

宋 陳與義 撰

七言古詩

題牧牛圖

千里烟草綠連山
新雨足老牛抱朝飢
向山影覓鯨犢
兒狂走先過浦
卻立長鳴待其母
母子爲人實倉廩
汝飽不慙人媿汝
牧童生來日日娛
只憂身大當把鋤
日

斜睡足牛背上不信人間有廣輿

題易元吉畫麋

紛紛騎馬塵及腹名利之窟爭馳逐眼明見此山中吏
怪底吾廬有林谷雄雌相對目炯炯意閒不受榮與辱
掇皮豈真皆自知坐令貓犬羞奴僕我不是李衛公欺
爾無魂規爾肉又不是曹將軍數肋射爾不遺鏃明牕
無塵簾有香與爾共此春日長戲弄竹枝聊卒歲不羨
晉宮車下羊

題唐希雅畫寒江圖

江頭雲黃天醞雪樹枝慘慘凍欲折耐寒野鴨不知歸
猶向沙邊弄羽衣黃茅終日不自力影亂弱藻相因依
惟有蒼石如卧虎不受陰晴與寒暑舟中過客莫敢侮
閒伴長江了今古

江南春

雨後江上綠客悲隨眼新桃花十里影搖蕩一江春朝
風逆船波浪惡暮風送船無處泊江南雖好不如歸老

金瓶梅詞話卷七
齊遶牆人得肥

蠟梅

智瓊額黃且勿誇
回眼視此風前葩
家家融蠟作杏蒂
歲歲逢梅是蠟花
世間真偽非兩法
映日細看真是蠟
我今嚼蠟已甘腴
況此有韻蠟不如
只愁繁香欺定力
熏我欲醉須人扶
不辭花前醉倒卧
經月是酒是香君
試別

螢火

翩翩飛蛾掩明燭見烹膏油罪莫贖嘉爾螢火不自欺
草間相照光煜煜卻馬已錄仙人方映書曾登君子堂
不畏月明見陋質但畏風雨難爲光

北風

北風掠野悲歲暮黃塵漲街人不度孤鴻抱飢客千里
性命么微不當怒梅花欲動天作難蓬飛上天得盤桓
十年卧木枝葉盡獨自人間不受寒

送張仲宗押戟歸閩中

翩然鴻鵠本不羣亦復爲口長紛紛去年弄影河北月
今年迎面江南雲還家不比陶令冷持節正效相如勤
青天白日映徒御玄髮絳旆明江濱舟前落花慰野老
浦口杜若愁湘君遙知詩成寄驛使萬里春色當見分
贈人以言予豈敢不忍負子聊云云舊山雖好慎勿過
恐有德璋能勒文

寄若拙弟兼呈二十家叔

退之送窮窮不去樂天待富富不來政須青山映黑髮

顧著皂蓋爭黃埃何如父子共一壑龐家活計良不惡
阿奴況自不錄錄白鷗之盟可同諾三間瓦屋亦易求
著子東頭我西頭中間共作老萊戲世上樂復有此不
問夢膏肓應已瘳歸來歸來無久留竹林步兵非俗流
爲道此意思同遊

聞葛工部寫華嚴經成隨喜賦詩

如來性海深復深留書與世湔蓬心畫沙累土皆佛事
況乃一字能千金老郎居塵念不起法中龍象人獅子

前身智永心了然結習未空猶寄此怪公聚筆如須彌
經成筆盡手不知凌雲題就韋誕老願力所到公何疑
珠函繡帙芝蘭室護持金剛竦神物枯葵應感不足論
毛穎陶泓俱見佛

陳叔易賦王秀才所藏梁織佛圖詩邀同賦因次
其韻

維摩之室本自空忽驚滿月臨丹宮稽首世尊真實相
不比圖畫填青紅天女之孫擅天巧經緯星宿超庸庸

淪精入此三昧手一念真到祇園中意匠經營與佛會
七寶欲動聲瓏瓏眉間毫光放未盡指下已帶旃檀風
飛梭本是龍變化挾大威德行神通恍若祇洹遇佛影
豈彼臺象能比崇共惟此事不思議細看衆巧無遺蹤
日浮雞園赤爛爛天入鷲嶺青叢叢那知金臂是正倒
但覺已挫千魔鋒龍天四衆儼然侍喜滿火宅俱成功
向來八風幾捲地衆寶行樹無摧挫老蕭區區佛所憫
豈與十二蟻虻同重雲之殿珠作帳一朝入海奔雷公

幸留此像不爲少福聚萬紀兼千總餘休八葉終灰燼
堅固卻賴三眠蟲似聞法猛竊絲像當時已不隨烟東
煌煌二寶照南北各攝萬鬼專其雄龍幸已耀東坡墨
驚夢不假撞洪鐘惟有絲圖晦幾歲留待公句貽無窮
畫沙累土皆見佛而況筆墨如此工亦念衆生業障厚
要與機杼聊分攻從今俱盡未來世買絲不繡平原容
送祕典座勝侍者乞麥

一春不雨但多風家家買龜問豐凶天寧疏頭與天通

泚筆未了雲埋空一雨三日勤老龍壟頭滿眼十分豐
法中福將兩英雄自詭去立丘山功堂頭老師言無工
一詩自直三千鍾不憂乞米送盧仝未章謹已藏胸中

食齋

君不見見領軍家有鞋一屋相國藏椒八百斛士患飢寒
求免患癡兒已足憂不足伯龍平生受鬼笑無錢可使
宜見瀆但當與作謫仙詩聊復使渠終夜哭詩中有味
甜如蜜佳處一哦三鼓腹空腸時作不平鳴卻恨忍飢

猶未熟冰壺先生當立傳木奴魚婢何足錄顏生狡獪
還可憐晚食由來未忘肉

古別離

東門柳年年歲歲征人手千人于此別柳亦能堪
幾人折願君遄歸與君期要及此柳未衰時

次韻富季申主簿梅花

東風知君將出遊玉人迴立林之幽歌牆數苞乃爾瘦
中有萬斛江南愁君哦新詩我聽瑩句裡無塵春色靜

人人索笑那得禁獨為君詩起君病欲語未語令人嗟
桃李回看眼中沙同心不見昭儀種五出時驚公主花
典衣重作明朝約聊復寬君念歸洛笛催疎影日更疎
快飲莫教春寂寞

錢東之教授惠澤州呂道人硯為賦長句

君不見銅雀臺邊多事土走上觚棱蔭歌舞餘香分盡
垢不除卻寄書林汙縑楮豈如此瓦凝青膏冷面不識
奸雄曹呂翁已去泣餘泣通譜未許弘農陶暮年得君

真耐久摩挲玉質雲生手未知南越石虛中亦有文章
似君否西家撲滿本弟昆趣尚清濁何年分一朝墮地
真瓦礫莫望韓公無瘞文

以石龜子施覺心長老

老龜十年作一息天地併入支牀力何年生此石腸兒
非皮裹骨骨裹皮君家元緒不慎口遂與老桑同一朽
知君遊世磨不磷往作道人之石友道人莫欺此龜無
六眸試與話禪當點頭

以紙託樂秀才擣治

古人爭名翰墨藪柿葉桑根俱不朽固知老楮下歐陽
控御管城須好手嫁非時好聊自強幅則甚短慙甚長
聞道蔡侯閒石臼為借餘力生銀光

述懷呈十七家叔

兒時學道逃悲歡只今未免憂飢寒浮生萬事蟻旋磨
冷官十年魚上竿竹林步兵亦忍辱長安閉門出無僕
門前故人擁廬兒政坐向來甘錄錄君不見古人有待

良不多利名溺人甚風波垂露成帟仲長統明月為燭
張志和塵中別多會日少世事欲談何可了胸中萬卷
已無用勸公留眼送飛鳥兩翁觀光今幾時賦歸有約
時已稽未暇藏身北山北且須覓地西枝西顧從我翁
歸洗耳不用妓女汙山水肩輿亦莫要僕夫自有門生
與兒子

秋雨

塵起一月憂無禾瓦鳴三日憂雨多書生重口輕肝腎

不如牆角蚯蚓方長哦少昊行秋龍洒道風作萬木皆
商歌病夫強起開戶立萬箇銀竹驚森羅人間偉觀如
此少倚杖不覺泥及靴菊叢欹倒未足道老景知奈梧
桐何是事且置當務本菜圃已添三萬科

中秋不見月

去年中秋端正月照我霓襟萬條血姮娥留笑待今年
淨洗金觥對銀闕高唐妬婦心不開招得封姨同作難
豈惟恨滿月宮裏腸斷西山吳綵鸞卻疑周生懷月去

待到三更黑如故人間今乏趙知微無復清遊繼天柱
南枝烏鵲不敢譁倚杖三歎風枝斜明年强健更相約
會見林間金背蟄

來禽花

來禽花高不受折滿意清明好時節人間風日不貸春
昨夜胭脂今日雪含東蕪菁滿眼黃胡蝶飛去轉斜陽
妍媸都無十日事付與梧桐一夏涼

送王周士赴發運司屬官

寧食三斗塵有手不揖無詩人寧飲三斗醋有耳不聽
無味句牆東草深蘭發薰君先夢我我夢君夢君小牕
誦詩燈花起牕外北風怒未已書生得句勝得官風其
少止盡人歡五更月暈一千丈明日君當泛淮浪去去
三十六策中第一買酒廬北風

初至陳留南鎮夙興赴縣

五更風搖白竹扉整冠上馬不可遲三家陂口聲喔喔
早于昨日朝天時行雲弄月翳復吐林間明滅光景奇

川原四望鬱高下蕩搖蒼茫森陸離客心忽動羣雁起
馬影漸薄村墟移須臾東方雲錦發向來所見今難追
兩眼聊隨萬象轉一官已判三年癡只將乘除了吾事
推去木枕收此詩寫我新篇作畫障不須更覓丹青師
同楊運幹黃秀才觀取魚于寶家池以錢得數斗
置驛西野塘中圍圍而逝我輩皆欣然也

閉門讀書生白髮閒向村東看魚穴曾隨樹影數圓波
鐵面漁翁肝肺別向來癡腹負此翁只可買放蓮塘中

萬事成虧等閒裏他年此地費雷風

贈黃家阿莘

君家阿莘如白玉呼來燈前語陸續可憐卽罷窮一生
只今有汝照茅屋豬生十子豚復豚阿莘明年可當門階
庭一笑不外索萬事紛紛何足論

難老堂

城南鳥聲和且都我識丈人屋上烏難老堂中一尊酒
不敢霜雪上髭鬚樊侯種梓用莫竭丈人向來亦種德

挽回萬事入繩牀花竹相看有佳色人生知足一飽多
當時恨我棄漁蓑題詩素壁蛇蚓集五百年後公摩挲

鄧州城樓

鄧州城樓高百尺楚岫秦雲不相隔傍城積水晚更明
照見綸巾倚樓客李白上天不可呼陰晴變化還須臾
獨撫危闌詠奇句滿樓風月不枝梧

方城陪諸兄坐心遠亭

客中日食三斗塵北去南來了今歲暫時亭中一杯酒

與兄同宗復同味博山雲氣終日留竹君蕭蕭不負秋
世路明年儻無故卻攜藜杖更來遊

簡齋集卷七

欽定四庫全書

簡齋集卷八

宋 陳與義 撰

七言古詩

遊南嶂同孫信道

遙瞻南嶂深復深
雙崖與天藏太陰
青鞋濟勝不能嬾
踏破積雪窮崎嶇
空中朽樹抱孤篠
無竅蒼壁生橫林
孤禽三叫危石裂
欲返未返神蕭森
磴迴忽然何處所

當面烟如翠蛟舞石門泄風無晝夜古木截道藏雷雨
丹丘赤城去幾許下視人間足塵土放身天地不自知
導以龍蛇翼熊虎山中異事記今晨杖藜得道孫與陳
欲離均陽而雨不止書八句寄何子應

江城八月楓葉彫城頭哦詩江動搖秋雨留人意戀戀
水色泛樹風蕭蕭綸巾老子無遠策長作東西南北客
不如何遜在揚州坐待梅花映妝額

里翁行

里翁無人支緩急天雨壞牆百憂集賣衣雇人築得牆
不慮偷兒披戶入夜寒千擲不經過偷兒若來知奈何
君不見巴丘古城如培塿魯肅當年萬人守

長歌行

遭亂方知承平樂偏安更覺中原好巴陵十月江不平
萬里北風吹客倒洞庭葉稀秋聲歇黃帝樂罷川杲杲
君山偃蹇橫歲暮天映湖南白如掃人世多違壯士悲
干戈未定書生老揚州雲氣鬱不動白首頻回費私禱

后勝誤齊已莫追范蠡圖越當若為皇天豈無悔過意
君子慎惜經綸時願聞羣公張王室臣也安眠送餘日

陰風

陰風三日吹南極二月已陵寒裂石長林巨木受軒輊
洞庭倒流瀟湘黑君不見古廬竹扉聲策策中有玲玕
落南客曾經破膽向炎官敢不修容待風伯

送王因叔赴試

楓落南紀明秋高洞庭白自是天涯人更送湖上客人

生險易乘除裏富貴功名從此起不須惜別作酸然滿
路新詩付吾子

留別康元質教授

腐儒身世已百憂此去行年豈堪記岳陽樓前一杯酒
與子同舟復同味洞庭秋氣連蒼梧天高地冷魚龍呼
莫倚仲宣能作賦不隨文若事征途

奇父先至湘陰書來戒由祿唐路而僕以他故由
南陽路來夾道皆松如行青羅步障中先寄奇父

雲接湘陰百里松肅肅穆穆湖南風隨時憂樂非人事
迎我笙簫起道中竹輿兩面天明滅秋令不到林西東
未必祿唐能辦此題詩著畫寄興公

正月十二日至邵州十三日夜暴雨滂沱

邵州正月風氣殊鶉尾之南更山塢昨日已見三月花
今夜還聞五月雨牋與天公一破顏走避北騎趨南蠻
夢到龍門聽澗水覺來簷溜正潺潺

謝主人

春禽勸我歸主人留我住一笑謝主人我自無歸處擬
借溪邊三畝春結茅依樹不依鄰伐薪正可煩名士分
米何須待故人

雷雨

憶昨炎正中不融元帥仗鉞臨山東萬方嗷嗷叫上帝
黃屋已照睢陽宮嗚呼吾君天所立豈料四載猶服戎
禹巡會稽不到海未省駕舶觀民風定知諫諍有張猛
不可危急無高共自古美惡周必復兵戈汝莫窮妖凶

吉語四奏元氣通德音夜發春改容雷雨一日徧天下
父老感泣霑其胸臣少憂國今成翁欲起荷戟傷疲瘵
小遊太乙未移次大樹將軍莫振功劉琨祖逖未足雄
晏球一戰烟塵空諸君努力光竹素天子可使塵常蒙
君不見夷門山頭虎復龍向來佳氣元葱葱

遙碧軒作呈使君少隱時欲赴召

我本山中人一喚起趨埃塵君為邊城守作意邀山
入牕牖朝來爽氣如有期送我憑軒一杯酒丈夫已忍

猿鶴羞欲去且復斯須留西峯木脫亂髮擁東嶺烟破
脩眉浮主人愛客山更好醉裏一笑驚蠻州丁寧雲雨
莫作厄明日青山當逐客

同范直愚單履遊浯溪

瀟湘之流碧復碧上有鐵立千尋壁河朔功就人預能
湖南碑成江動色文章得意易為好書雜劔矛天假力
四百年來如創見雷公雨師知此石小儒五載憂國淚
杖藜今日溪水側欲搜奇句謝兩公風作浪湧空心惻

已酉中秋之夕與任才仲醉于岳陽樓上明年十
一月二十日南遊過道謁姜光彥出才仲畫軸則
寫是夕事也剪燭觀之恍然一笑書八句以當畫

記

去年中秋洞庭野寒瑤萬頃兼天瀉岳陽樓上兩幅巾
月入闌干影瀟洒世間此影誰能孤狂如我友人所無
一夢經年無續處道州還見倚樓圖

風興

美哉木枕與管席無禁當興戴朝幘巷南巷北聞鍛聲
舍後舍前惟月色國事無功端未去竹輿伊軋猶昨日
不見武林城裏事繁華夢覺生荆棘成敗由來幾古今
乾坤但可著山澤西湖已無金碧麗雨抹晴妝尚娛客
會當休日一訪之摩挲蒼蘚慰崖石只恐冷泉亭下水
發明白髮增歎息

秋夜獨酌

涼秋佳夕天氣廓河漢之涯秋漠漠月出未出林彩變

幽人露坐方獨酌自歌新調酒如空天星下飲觥船中
忽思李白不可見夜半喬木搖西風百年佳月今幾夕
憂樂相尋老來疾瓊瑤滿地我影橫添酒賦詩何可失
黃修職雨中送芍藥五枝

微雨濕清曉老夫門未開煌煌五仙子竝擁翠蕤來胭
脂洗盡不自惜為雨歸來更無力老夫五十尚可嘲憑
軒一賦會真詩

均臺詞二首

小臺借春春已來平分和氣入均臺夜來臺邊草環綠
今朝芒生滿三木街頭拍手闌干兒齊唱中和宣布曲
使君坐嘯闌如雲請釀百川壽使君但願使君長樂職
不須更看杓虛實

東家西家爾我來聽說空圖如春臺決曹高卧印生綠
叢棘化為交遜木策勲此木那可遺動地風搖枝不曲
願我無訟到來雲莫辭著力借寇君借得賢侯雖爾職
但恐朝廷要人調鼎實

留別葛汝州

平生師友塵莫數兩眼偏明向公許
一時盛德人中驥四海知名地上虎
東序階墀再鞞板西州杖履三寒暑
我方庶兄湯惠休公乃小兒楊德祖
未頒還朝尺一詔不媿專城丈二組
為公刺買銀管筆容我時親玉柄塵

近蒙五字落珠璣

杜牧之詩云五字落珠璣

如服一丸生翅羽別離

真成惜夜燭感歎更值歌朝雨
行看入侍玉皇案與進

不待金剛杵勸公慎勿學孔光薦士何妨似張禹

孔光傳弟

子見光居大位幾得其助光終一無所薦其公如此張
禹傳禹成就弟子尤著者淮陽彭宣至大司空沛郡戴
崇至少
府九卿

蒙賜佳什欽歎不足不揆淺陋輒次元韻

退之高文仰東岱籍湜傳盟其足賴固知法嗣要龍象
先生端是毗陵派方駕曹劉蓋餘力壓倒元白聊一快
向來班門收衆材賓履費公珠幾琲三熏曾有堪此事
羣吠未免驚所怪但知樓仰百尺顛豈覺波涵千頃外
南州短簿令公喜巍我我冠陸離佩有如若士那可無

筆勢已超聲律界相將問道留十日滿座真成折牀會
清詩忽復墮華牋要使握瑜誇等輩

蒙示詠家弟所撰班史屬辭長句三數之餘輒用
元韻以示家弟謹布師席

雋永雜俎雖甚旨何似三冬足文史羨子皮裏西京書
議論逼人驚疊疊戲為韻語網所遺人皆百能子千之
雖非張巡徧記誦豈與李翰爭毫釐不待區區隸古定
便令景宗知競病掇要虛煩四十篇三卷之博能擬聖

儒林文人摘藻春作詩印可融心神我亦從今悔迂學
不須更辨瓚稱臣

蒙再示屬辭三歎之餘讚美巨麗無地託言輒依
元韻再成一章非獨助家弟致謝區區少裨之使進
學焉亦師席善誘之意也

書如嘉穀要知旨區區太沖空詠史百年能挂幾牛角
火急編摩時疊疊柳家文類今無遺可忍行事空違之
此書真是羣玉府事辭所不遺毫釐子不見劉勰書成

要人定豈但令人愈頭病偶向車前問沈公果符夢裏
隨先聖兩詩入手喜生春從今護持知有神便可繕寫
持獻御注解不須煩五臣

昨日侍中鉢飯于天寧蒙示佳什謹次韻

朱門未知禪悅義富不期奢奢自至二薤雖寒故是公
萬羊賈禍徒封衛我公居塵不染塵便隨一鉢遺甘辛
出家雖非將相事食菜要是英雄人懼儒一生用心苦
何曾夢見雞映黍中丞惜福幸見分晚食從公當羔羖

崔趙公問徑山曰弟子出家得否答曰出家是大丈夫事豈將相所爲出李肇國史補洪州康使問一禪師曰弟子喫酒肉即是不喫酒肉即是在答曰若喫是中丞祿不喫是中丞福

蒙再示佳什不敢虛厚賜謹再用韻

先生明經今蔡義念佛仍師大勢至

大勢至王子曰我本因地以念佛心

入無生地

食菜不待周顒書要斷貪殺兼自衛顏回平生拾

墮塵蓼蟲食蓼忘其辛先生種福我無禍成佛定是同

功人兩詩見戒言甚苦肯賦黃雞啄秋黍從今但見嬾

殘芋不敢求嘗鑒虛筠

案以上五首原本連接留別葛汝州詩後未標所指何人

承知府待制誕生之辰輒廣善思菩薩故事成古
詩一首仰惟經世之外深入佛海而某欲託辭以
寄款款適獲此事發寤于心似非偶然者獨荒陋
不足以侈此殊慶耳

歲星欲吐芒不開昴星避此光低徊麒麟驚驚紛夾侍
善思菩薩當重來仙公風流今幾歲再託高門瑞當世
買香趁浴驚衆聲要識此僧今我是金粟後身何足言
釋迦親送非虛傳稽首西來大菩薩住世小劫須千年

宰官說法聊應會餘事文章亦三昧世間底物堪壽公

本自金剛無可壞

葛仙公起居注云于時在葛尚書家尚書年八十始有此子時忽有沙門

自稱天竺僧于市大買香市怪問僧曰昨夜夢善思菩薩生葛尚書家將以香浴之到生時僧至燒香右繞三匝禮拜恭敬沐浴而止靈寶法輪經云葛仙公生始數日有外國沙門見仙公禮拜抱持而告仙公父母曰此是西方善思菩薩今來漢地教化衆生

遊紫邏洞

我不願封萬戶侯願向紫邏從公遊
鄆州溪堂號州洞
未有退之詩可留水近山流清澈底竹飽千霜節如此

廊廟之具千金軀底事便著山巖裏蒲鞭挂壁一事無
環珮聲中了朝晡祝融不到深林處客至五月懷貂狐
徇華大夫無此樂從渠遮山用翠幕若問此間奇絕處
但道胸中有丘壑

雪

仙人手持白鸞尾夜半朝元明月裏羽衣三振風不斷
下視銀潢一千里玉軼載花分後前欲落未落天恍然
餘標從向人間去乞與袁安破曉眠

欽定四庫全書

集部

簡齋集卷

九至
十二

詳校官庶吉士臣翁樹培

侍讀臣孫球覆勘

總校官編修臣王燕緒

校對官中書臣石鴻漸

謄錄監生臣沈錫爵

謄錄監生臣戈廷模

欽定四庫全書

簡齋集卷九

宋 陳與義 撰

五言律詩

送呂欽問監酒受代歸

以我千金帚逢君萬斛船
要知窮有自未覺嬾相先
盆盎三年夢篇章四海傳
忽忽秣歸馬離恨滿霜天

寄新息家叔

風雨淮西夢危魂費九升一官遮日手兩地讀書燈見
客深藏舌吟詩不負丞竹林雖有約門戶要人興

年華

去國頻更歲為官不救飢春生殘雪外酒盡落梅時白
日山川映青天草木宜年華不負客一一入吾詩

茅屋

茅屋年年破春風歲歲來寒從草根退花值客愁開時
序添詩卷乾坤進酒杯片雲無思極日暮卻空迴

酴醾

雨過無桃李惟餘雪覆牆
青天映妙質白日照繁香
影動春微透花寒韻更長
風流到尊酒猶足助詩狂

秋雨

蕭蕭十日雨穩送祝融歸
燕子經年夢梧桐昨暮非一
涼思到骨四壁事多違
袞袞繁華地西風吹客衣

西風

木末西風起中含萬里涼
浮雲不愁思盡日只飛揚
夢

斷頭將白詩成葉自黃不關明主棄本出涸陰鄉

題許道寧畫

滿眼長江水蒼然何郡山向來萬里意今在一牕間衆
木俱含晚孤雲遂不還此中有佳句吟斷不相關

送張迪功赴南京掾二首

士固難推挽君其自寵珍詩成建安子名到斗南人晚
歲還為客微官只為身向來書盡熟去不媿張巡

岸闊舟仍小林空風更多能堪幾寒暑又作隔山河看

客休題鳳將書莫換鵝功名大槐國終要白鷗波

連雨書事四首

九月逢連雨瀟瀟穩送秋龍公無乃倦客子不勝愁雲
氣昏城壁鐘聲咽寺樓年年授衣節牢落向他州

風伯方安卧雲師亦少餐氣連河漢潤聲到竹松高老
鶴尤貪去寒蟬遂不號相悲更相識滿眼楚人騷

寒入薪芻價連天兩眼愁生涯赤藤杖契分黑貂裘烏
鵲無言暮蓬蒿滿意秋同時不同味世事劇悠悠

白菊生新紫黃蕪失舊青俱含歲晚恨併入夜深聽夢
寐連蕭索更籌亂晦冥雲移過吳越應為洗餘腥

道中寒食二首

飛絮春猶冷離家食更寒能供幾歲月不辦了悲歡刺
史蒲萄酒先生苜蓿盤一官違壯志百慮集征鞍
斗粟淹吾駕浮雲笑此生有詩酬歲月無夢到功名客
裏逢歸雁愁邊有亂鶯楊花不解事更作倚風輕

放慵

暖日熏楊柳濃春醉海棠放慵真有味應俗苦相妨
拙從人笑交疎得自藏雲移穩扶杖燕坐獨焚香

試院書懷

細讀平安字愁邊失歲華疎疎一簾雨淡淡滿枝花
投老詩成癖經春夢到家茫然十年事倚杖數棲鴉

棊

長日無公事閒圍李遠棊旁觀真一笑互勝不移時
幸未逢重霸何妨著獻之晴天散飛電驚動隔牆兒

赴陳留

馬上摩挲眼出門光景新
鴉鳴半陂雪路轉一林春
舊歲有三日全家無十人
平生鸚鵡盡今夕最關身

至陳留

烟際亭亭塔招人可得回
等閒為夢了老健出關來
日落河冰壯天長鴻雁哀
平安遠遊意隨處一徘徊

客裏

客裏東風起逢人只四愁
悠悠雜唯唯莫莫更休休
牕

影鳥雙度水聲船逆流一官成一集盡付古河頭

遊八關寺後池上

落日生春色微瀾動古池柳林橫絕野藜杖去尋詩不
有今年謫爭成此段奇殷勤雪顱老隨客轉荒陂

寒食

草草隨時事蕭蕭傍水門濃陰花照野寒食柳圍村客
袂空佳節鶯聲忽故園不知何處笛吹恨滿青尊

雨

沙岸殘春雨茅簷古鎮官一時花帶淚萬里客憑闌日
晚薔薇重樓高燕子寒惜無陶謝手盡意破憂端

發商水道中

商水西門語東風動柳枝年華入危涕世事本前期草
草檀公策茫茫杜老詩山川馬前澗不敢計歸時

四軒寓居

牢落西軒客巡簷費獨吟桃花明薄暮燕子開微陰辛
苦元吾事淹留更此心小牕隨意寫蛇蚓起相尋

縱步至董氏園亭

池光脩竹裏
筇杖季春頭
客子愁無奈
桃花笑不休
百年今日勝
萬里此生浮
莽莽前事題
詩記獨遊

春雨

花盡春猶冷
羈心只自驚
孤鶯啼永晝
細雨濕高城
擾成何事悠
悠送此生
蛛絲閃夕霽
隨處有詩情

雨

忽忽忘年老
悠悠負日長
小詩妨學道
微雨好燒香
簷

鵲移時立庭梧滿意涼此身南復北彷彿是他鄉

夏夜

閒弄玉如意天河白練橫時無李供奉誰識謝宣城兩鵲翻明月孤松立快晴南陽半年客復此滿懷清

將次葉城道中

荒野少人去竹輿伊軋聲晴雲秋更白野水暮還明寂寞信吾道淹留諳物情王喬有餘舄借我一東征

至葉城

蘇武初逢雁王喬欲借鳬深知念行李為報了長途難
穩三更枕遙憐五歲雛卻思正月事不敢恨榛蕪

岸幘

岸幘立清曉山頭生薄陰亂雲交翠壁細雨濕青林時
改客心動鳥鳴春意深窮鄉百不理時得一閒吟

雨

雲起谷全暗雨晴山復明青春望中色白澗晚來聲遠
樹鳥羣集高原人獨耕老夫逃世久堅坐聽陰晴

聞王道濟陷敵

海內堂堂友如今在敵圍
虛傳袁盎脫不見華元歸
浮世身難料危途計易非
雲孤馬西嶺老淚不勝揮

夜賦寄友

賣藥韓康伯談經管幼安
何來甘寂寞不是為艱難
明月扶疎樹空園浩蕩寒
細題今夕景持與故人看

雨

霏霏三日雨靄靄一園青
霧澤含元氣風花過洞庭
地

偏寒浩蕩春半客
鈴鐸多少人間事
天涯醉又醒

細雨

避寇煩三老
那知是舊遊
平湖受細雨
遠岸送輕舟
天地悲深阻
山川慰久留
參差發鄰舫
未覺壯心休

別伯恭

尊酒相逢地
江楓欲盡時
猶能十日客
共出數年詩
供世無筋力
驚心有別離
好為南極柱
深慰旅人悲

再別

多難還分手江邊白髮新公為九州督我是半途人政
爾傾全節終然卻要身平生第溫嶠未必下張巡

別孫信道

萬里鷗仍去千年鶴未歸極知身有幾不奈世相違歲
暮蒹葭響天長鴻雁微如君那可別老淚欲沾衣

適遠

處處非吾土年年避敵兵何妨更適遠未免一傷情石
岸烟添色風灘暮有聲平生五字律頭白不貪名

道中

雨子收還急溪流直又斜迢迢傍山路漠漠滿林花破
水雙鷗影掀泥百草芽川原有高下隨處著人家

金潭道中

晴路籃輿穩舉頭閒望賒前岡春泱泱後嶺雪搓枒海
內兵猶壯村邊歲自華客行驚節序回眼送桃花

曉發杉木

古澤春光淡高林露氣清紛紛世上事寂寂水邊行客

子凋雙鬢田家自一生有詩還忘記無酒卻思傾

初至邵陽逢入桂林使作書問其地之安危

湖北彌年所長沙費月餘初為邵陽夢又作桂林書老
矣身安用飄然計本疎管寧遼海上何得便端居

過孔雀灘贈周靜之

海內無堅壘天涯有近親不辭供笑語未慣得殷勤舟
楫深宜客溪山各放春高眠過灘浪已寄百年身

夜抵貞牟

野暝猶聞遠川明，不恨遲焚山隔岸。
火及我繫船時，夜半青燈屋籬前。
白水陂殷勤謝地主，小築欲深期。

晚步

畎畝意不釋，出門聊散憂。
雨餘山欲近，春半水爭流。
衆籟夕還作，孤懷行轉幽。
溪西篁竹亂，微徑雜歸牛。

雨

雲物淡清曉，無風溪自閒。
柴門對急雨，壯觀滿空山。
春發蒼茫內，鳥鳴篁竹間。
兒童笑老子，衣濕不知還。

洛頭書事

綸巾古鶴氅日暮柵林間誰使翁迎客應聞屐響山占
年又得熟勸我不須還村酒困壯士水風吹醉顏

夏夜

遠遊萬事裂獨立數峯青明月照山木荒村饒夜螢翻
翻雲度漢歷歷水浮星遙舍燈已盡幽人門未扃

愚溪

小閣當喬木清溪抱竹林寒聲日暮起客思雨中深行

李妨幽事闌干試獨臨終然遊子意非復昔人心

宿資聖院閣

暮投山崦寺高處絕人羣遠岫林間見微泉舍後聞閣
虛雲亂入江闊野橫分欲與僧為記今年嬾作文

過下杯渡

夜宿下杯館朝鳴一棹東湖平天盡落峽斷海橫通冉
冉雲隨舸茫茫鳥遡風仙人蓬島上遙見我乘空

泛舟入前倉

曾鼓鹽田棹前倉不足言盡行江左路初過浙東村春
去花無迹潮歸岸有痕百年都幾日聊復信乾坤

簡齋集卷九

欽定四庫全書

簡齋集卷十

宋 陳與義 撰

五言律詩

病中夜賦

抱病喜清夜形羸心獨開
不知藥鼎沸錯認雨聲來
歲晚燈燭麗天長鴻雁哀
書生惜日月欹枕意茫哉

瓶中梅

明牕淨幾几玉立耿無鄰紅綠兩重袂殷勤滿面春曾
為庾嶺客本是洛陽人老我何顏貌東風處處新

除夜

疇昔追歡事如今病不能等閒生白髮耐久是青燈海
內春還滿江南硯不冰題詩餞殘歲鐘鼓報晨興

雨中

北客霜侵鬢南州雨送年未聞兵革定從使歲時遷古
澤生春靄高空落暮鴛山川含萬古鬱鬱在尊前

渡江

江南非不好楚客自生哀
搖楫天平渡迎人樹欲來
雨餘吳岫立日照海門開
雖異中原險方隅亦壯哉

得張正字

送我茅屋底天寒人跡稀
一觴尤有味萬事已無機
歲暮塔孤立風生鴉亂飛
此時張正字書札到郊扉

小閣

闌干橫歲暮徙倚度陰晴
木落太湖近梅開南紀明
病

餘仍愛酒身後更須名鵲鶴忽雙起吾詩還欲成

得長春兩株植之牕前

鄉邑已無路僧廬今是家聊乘數點雨自種兩叢花籬
落失秋序風烟添歲華衰翁病不飲獨立到棲鴉

拒霜

拒霜花已吐吾宇不淒涼天地雖肅殺草木有芬芳道
人宴坐處侍女古時妝濃露濕丹臉西風吹綠裳

心老久許為作畫未果以詩督之

布衲王摩詰禪餘寄筆端試將能事迫肯作畫工難秋
入無聲句山連欲雨寒平生夢想處奉乞小巘岈

知府示秋日郡圃佳製次韻四首

歲月移文外乾坤杖屨中鏗然五字律健在百夫雄秋
入池深碧寒欺葉遞紅此間兼吏隱端不減遊嵩

客有
遊嵩

山者歸以語公公
以不得遊為恨

鳥語知公樂山晴及我遊盡排物外事拚作酒中浮菊
葉離雙鬢林聲隱四愁騷人例喜賦政自不關秋

竹際笙簧起回聽衆籟微時陪物外賞肯念日斜歸草
色違秋意池光淨客衣吟公清絕句政爾不能肥

一笑聊開口千憂不上眉林深受風得柏老到霜知小
憩逢筠洞幽尋及枳籬願公勤秉燭裁詠棗離離

翁高郵挽詩

萬里功名路三生翰墨身暮年銅虎重浮世石羊新天
地慳豪傑山川泣吏民空傳四十誄竟不識斯人

劉大資挽詞二首

天柱欹傾日堂堂墮急圓遂聞王蠋死不見華元歸一
代名超古千年淚染衣當時如有繼猶足變危機

一死公餘事由來彼亦人使知臨難日猶有不欺臣河
洛傾遺憤英雄歎後塵煌煌中興業公合冠麒麟

七言律詩

次韻周教授秋懷

一官不辦作生涯幾見秋風卷岸沙宋玉有文悲落水
陶潛無酒對黃花天機袞袞山新瘦世事悠悠日自斜

誤矣載書三十乘東門何地不宜瓜

夜雨

經歲柴門百事乖此身只合卧蒼苔蟬聲未足秋風起
木葉俱鳴夜雨來碁局可觀浮世理燈花應爲好詩開
獨無宋玉悲歌念但喜新涼入酒杯

連雨不能出有懷同年陳國佐

雨師風伯不吾謀漠漠窮陰斷送秋欲過蘇端泥浩蕩
定知高鳳麥漂流簷前甘菊已無益階下決明還可憂

安得如鴻六尺馬暫時相就說新愁

目疾

天公嗔我眼常白故著昏花阿堵中不怪參軍談瞎馬
但妨中散送飛鴻著籬令惡誰能對損讀方奇定有功
九惱從來自佛種會如那律證圓通

以事走郊外示友

二十九年知已非今年依舊壯心違黃塵滿面人猶去
紅葉無言秋又歸萬里天寒鴻雁瘦千村歲暮鳥烏微

往來屑屑君應笑要就南池照客衣

十月

十月北風催歲闌九衢黃土汙儒冠歸鴉落日天機熟
老雁長雲行路難欲詣熱官憂冷語且求濁酒寄清歡
孤吟坐到三更月枯木無枝不受寒

題小室

暫脫朝衣不當閒澶州夢斷已多年諸公自致青雲上
病客長齋繡佛前隨意時爲獅子卧安心嬾作野狐禪

爐烟忽散無蹤跡屋上寒雲自黯然

次韻張廸功春日

年年春日寒欺客今日春無一半寒不覺轉頭逢歲換
便須揩眼待花看爭新遊女幡垂鬢依舊先生日照盤
從此不憂風雪厄杖藜時可過蘇端

又和歲除感懷用前韻

宦情吾與歲俱闌只有詩盟偶未寒鬢色定從今夜改
梅花已判隔年看高門召客車稠疊下里燒香篆屈盤

我亦三杯聊復爾夢回鷓鴣出朝端

張迪功攜詩見過次韻謝之二首

黃紙紅旗意未闌青衫俱不救飢寒久拋三徑未得返
偶有一錢何足看世事豈能磨鐵硯詩盟聊可敵銅盤
不嫌野外時紆益政要相從叩兩端

黃雞白日唱初闌便覺杯觴耐薄寒坐上客多真足樂
牀頭易在不須看更思深徑按紅藥政待移廚洗玉盤
苦恨重城催興盡歸時落日尚雲端

卽席重賦且約再遊二首

牆頭花定覺風闌
牆外池深酒亦寒
馬健莫愁歸路遠
詩成未許俗人看
釣魚不用尋溫水
濯髮真如到洧盤
一笑得君天所借
尊前無地著憂端

詩情不與歲情闌
春氣猶兼水氣寒
怪我問花終不語
須公走馬更來看
共知浮世悲駒隙
卽見平波散芡盤
得一老兵雖可飲
從今取友要須端

次飲家叔

袞袞諸公車馬塵先生孤唱發陽春黃花不負秋風意
白髮空隨世事新閉戶讀書真得計載肴從學豈無人
只應又被支郎笑從者依然困在陳

次韻答張迪功坐上見貽張將赴南都任二首

足錢便可不須侯免對妻兒賦百憂一笑相逢亦奇事
平生所得是清流談天安用如鄒子掃地還應學趙州
南北東西底非夢心閒隨處有真游

千首能輕萬戶侯誦君佳句解人憂夢闌塵裏功名晚

笑罷尊前歲月流
世事無窮悲客子
梅花欲動憶吾州
明朝又作河梁別
莫負平生馬少游

次韻謝表兄張元東見寄

平生張翰極風流
好事工文妙九州
燈裏偶然同一笑
書來已似隔三秋
林泉入夢吾當隱
花鳥催詩歲不留
安得清談一陶寫
令人絕憶許文休

若拙弟說汝州可居已約卜一丘用韻寄元東

四歲冷官桑濮地
三年羸馬帝王州
陶潛迷路已良遠

張翰思歸那待秋病鶴欲飛還踟躕孤雲將去更遲留
盍簪共結雞豚社一笑相從萬事休

元方用韻見寄次韻奉謝兼呈元東二首

大難詞源三峽流小難詩不數蘇州了無徐生齊氣累
正值甯子商歌秋鵲飛千里從此始驥絕九衢誰得留
歲晚煩公起我病兩篇三歎不能休

一歡玄髮水東流兩脚黃塵閱幾州王湛時須看周易
虞卿未敢著春秋不辭彭澤腰常折卻得邯鄲夢少留

有句驚人雖可喜無錢使鬼故宜休

元方用韻寄若拙弟邀同賦元方將託若拙覓顏
淵之五十畝故詩中見意

夢中與世極周流錯認三刀是得州擬學耕田給公上
要爲同社醉春秋囊間已辦青芒屨桑下想聞黃栗留
儻有幽人謔出處爲言無況莫來休

西郊春事寢入老境元方欲出遊以無馬未果今
得詩又有舉鞭何日之歎因次韻招之

毛穎陳玄雖勝流也須從事到青州重吟玉樹懷崔子
欲唱金衣無杜秋官柳正須工部出園花猶為退之留
籃輿自可煩兒輩一笑來從樾下休

答元方述懷作

不見圓機論九流紛紛騎鶴上揚州令之敢恨松桂冷
君叔但傷蒲柳秋汝海蛇杯應已悟襄陵駒隙竟難留
來牛去馬無窮債未蓋棺前盡少休

次韻家弟碧線泉

七孔穿針可得過
冰蠶映日吐寒波
練飛空詠徐凝水
帶斷疑分漢帝河
川后不愁微步機
鮫人暗動卷綃梭
才高下視玄虛賦
對此區區轉患多

次韻光化宋唐年主簿見寄二首

茂林當日映羣賢也
喚畸人到席間
棄我便驚車轍遠
懷君端合鬢毛斑
夢中猶得攀珠樹
別後能忘倒玉山
遙想詩成寄來日
筆端風雨發天慳

高人主簿固非宜
天馬何妨略受羈
會有梅花堪寄遠

可因蓴菜便懷歸相如未免家徒壁季子行看妻下機
且復哦詩置此事江山相助莫相違

再用景純韻詠懷二首

路斷赤墀青瑣賢士龍同此屋三間愁邊潘令鬢先白
夢裏老萊衣更斑欲學大招那有賦試謀小隱可無山
一錢留得真堪笑未到囊空猶是慳

木枕蒲團病更宜從教惡少事鞦韆元無王老又何怨
不有翅生誰與歸六日取蟾非世用三年刻楮費天機

只因杖履從公處未覺平生與願違

同家弟用前韻謝判府惠酒

銜杯樂聖便稱賢無酒猶堪卧甕間使者在門雖僕僕
趨車入夢正斑斑不煩白水真人力來自青城道士山
千載王弘同竝美未應杞菊賦寒慳

日飲知非貧士宜要逃語穿稅心戰

楚辭心戰
羈而不亂

所須惟

酒非虛語以醉為鄉可徑歸鸚鵡鷓鴣俱得道螟蛉螺
贏共忘機狂言戲作麻姑送無奈聞人與我違

徙舍蒙大成賜詩

案此詩與前二首原本並錯置第十二卷景純再示佳什二章

之後致前二首所用韻及後一首謝楊工曹所用韻各離隔不屬今移正

南北東西共一塵得坻隨處可收身
卜居賦就知謀拙入宅詩成覺意新
三徑蓬蒿猶恨淺九流賓客未嫌貧
不須更待高軒過袖有珠璣已照鄰

謝楊工曹用前韻

借屋三間稍離塵攜書一束謾娛身
客居最負青春好世事還隨白髮新
造化小兒真薄相市朝大隱亦長貧

獨無芋栗供賓客虛辱先生賦比鄰

次十七叔去鄭詩韻二章以寄家叔一章以自詠
鄉里小兒真可憐市朝大隱正陶然固應聊頌屈原橘
底事便歌楊惲田廣陌遙知駒款段曲池猶記鷺聯拳
對牀夜雨平生約話舊應驚歲月遷

虬蟬堪笑亦堪憐撼樹無功更怫然賦就柳州聊解祟
詩成彭澤要歸田身謀共悔蛇安足理遣須看佛舉拳
懷祖定知當晚合次君未可怨稀遷

鏡中無復故人憐
卻媿謀生後計然
叔夜本非堪作吏
元龍今悔不求田
懷親更值薪如桂
作客重看粟過拳
萬事功違高枕卧
憂來一夕費三遷

簡齋集卷十

欽定四庫全書

簡齋集卷十一

宋 陳與義 撰

七言律詩

趙虛中有石名小華山以詩借之

君家蒼石三峯樣磅礪乾坤氣象橫
賤子與山曾半面小牕如夢慰平生
爐烟巧作公超霧書冊尚避秦皇城
病眼朝來欲開嬾借君巖岫障新晴

次韻樂文卿北園

故園歸計墮虛空。啼鳥驚心處處同。四壁一身長客夢。
百憂雙鬢更春風。梅花不是人間白。日色爭如酒面紅。
且復高吟置餘事。此身能費幾詩筒。

歸洛道中

洛陽城邊風起沙。征衫歲歲負年華。歸途忽踐楊柳影。
春事已到蕪菁花。道路無窮幾傾轂。牛羊既飽各知家。
人生擾擾成底事。馬上哦詩日又斜。

龍門

不到龍門十載強，斷崖依舊挂斜陽。
金銀佛寺浮佳氣，花木禪房接上方。
羸馬乍來還徑去，流鶯多處最難忘。
老僧不作留人意，看山看水白髮長。

次韻謝心老以緣事至魯山

禪師瓶貯幾多空，欲問以書無去鴻。
魯縣人迎般若杖，天寧樹起吉祥風。
荒山春色篇章裏，快士交情筆硯中。
一日塵沙雙眼碧，歸時應與去時同。

友人惠石兩峯巉然取杜子美玉山高竝兩峯寒之句名曰小玉山

舊喜欢看書今不看且留雙眼向孱顏從來作夢大槐國此去藏身小玉山暮靄朝曦一生了高天厚地兩峯間九華詩句喧寰宇細比真形伯仲間

家有壺中九華石刻

次韻王堯明郊祀顯相之作

奏書初不待衡譚奠璧都南萬玉參黃屋倚霄明半夜紫壇承月眩諸龕聲喧大呂初終六影動玄圭陟降三

可是天公須羯鼓已迴寒馭作春酣

道山宿直

離離樹子鵲驚飛獨倚枯筇無限時千丈虛廊貯明月
十分奇事更新詩人間路絕牕扉語天上雲空閣影移
遙想王戎燭下算百年辛苦一生癡

雨晴

天缺西南江面清纖雲不動小灘橫牆頭語鵲衣猶濕
樓外殘雷氣未平盡取微涼供穩睡急搜奇句報新晴

今宵勝絕無人共卧看星河盡意明

十月

十月天公作許悲負霜鴻雁不停飛
莽連萬里雲山去紅盡千林秋徑歸
病夫搜句了節序小齋焚香無是非
睡過三冬莫開戶北風不貸芰荷衣

漫郎

漫郎功業太悠然挂笏看山了十年
黑白半頭明鏡裏丹青千樹惡風前
星霜屢費驚人句天地元須使鬼錢

踏破九州無一事只今分付結跏禪

送善相僧超然歸廬山

九疊峯前遠法師長安塵染坐禪衣十年依舊雙瞳碧
萬里今持一笑歸鼠目向來吾自了龜腸從與世相違
酒酣更欲煩公說黃葉漫山錫杖飛

對酒

新詩滿眼不能裁鳥度雲移落酒杯官裏簿書無日了
樓頭風雨見秋來是非衮衮書生老歲月忽忽燕子回

笑撫江南竹根枕一尊呼起鼻中雷

後三日再賦

天生癭木不須裁說與兒童是酒杯落日留霞知我醉
長風吹月送詩來一官擾擾身增病萬事悠悠首獨回
不奈長安小車過睡鄉深處作奔雷

對酒

在陳留賦

陳留春色撩詩思一日搜腸一百迴燕子初歸風不定
桃花欲動雨頻來人間多待須微祿夢裏相逢記此杯

白竹扉前客醉舞烟村渺渺欠高臺

感懷

少日爭名翰墨場只今扶杖送斜陽
青青草木浮元氣渺渺山河接故鄉
作吏不妨三折臂搜詩空費九迴腸
子房與我同羈旅世事千般酒一觴

招張仲宗

北風日日吹茅屋幽子朝朝只地爐
客裏賴詩增意氣老來惟嬾是工夫
空庭喬木無時事殘雪疎籬當畫圖

亦有張侯能共此焚香相待莫徐徐

寓居劉倉廨中晚步過鄭倉臺上

綸巾鶴氅過荒陂滿面春風二月時
世事紛紛人易老春陰漠漠絮飛遲
士衡去國三間屋子美登臺七字詩
草遶天西青不盡故國歸計入支頤

晚步順陽門外

六尺枯藜了此生順陽門外看新晴
樹連翠篠圍春晝水泛青天入古城
夢裏偶來那計日人間多事更聞兵

只應十載溪橋路欠我嬾姍勃窣行

秋日客思

南北東西俱我鄉聊從地主借胡牀諸公共得何侯力
遠客新抄陸氏方老去事多藜杖在夜來秋到葉聲長
蓬萊可託無因至試覓人間千仞岡

寄李申

雨歇城西泥未乾遙知獨立整衣冠舊時鄴下劉公幹
今日遼東管幼安綠陰展盡身猶遠黃鳥飛來節已闌

金天正人卷十一
安得一尊生耳熱暫時相對說悲歡

重陽

去歲重陽已百憂今年依舊歎羈遊
籬底菊花惟解笑鏡中頭髮不禁秋
涼風又落宮南木老雁孤鳴漢北州
如許行年那可記謾排詩句寫新愁

送客出城西

鄧州誰亦解丹青畫我羸驂曉出城
殘年政爾供愁了末路那堪送客行
寒日滿川分衆色暮林無葉寄秋聲

垂鞭歸去重回首意落西南計未成

得席大光書以詩迓之

十月風高客子悲故人書到暫開眉也知廊廟當推轂
無奈江山好賦詩萬事莫論兵動後一杯當及菊殘時
喜心翻倒相迎地不怕寒林十里陂

無題

六經在天如日月萬事隨時更故新江南丞相浮雲壞
洛下先生宰木春孟喜何妨改師法京房底處有門人

舊愛讀書今嬾讀焚香閱世了閒身

清明

雨晴閒步澗邊沙行入荒林聞亂鴉寒食清明驚客意
暖風遲日醉梨花書生投老王官谷壯士偷生漂母家
不用鞦韆與蹴鞠只將詩句答年華

觀江漲

漲江臨眺足消憂倚杖江邊地欲浮疊浪併翻孤日去
兩津橫卷半天流龜鼉雜怒爭新穴鷗鷺驚飛失故洲

可為一官妨快意眼中惟覺欠扁舟

舟次高舍書事

漲水東流滿眼黃泊舟高舍更情傷一川木葉明秋序
兩岸人家共夕陽亂後江山元歷歷世間岐路極茫茫
遙指長沙非謫去古今出處兩淒涼

登岳陽樓二首

洞庭之東江水西簾旌不動夕陽遲登臨吳蜀橫分地
徙倚湖山欲暮時萬里來遊還望遠三年多難更凭危

白頭弔古霜風裏老木蒼波無限悲

天入平湖晴不風夕帆和雁正浮空樓頭客子杪秋後
日落君山元氣中北望可堪回首南遊聊得看丹楓
翰林物色分留少詩到巴陵還未工

巴丘書事

三分書裏識巴丘臨老避兵初一遊晚木聲酣洞庭野
晴天影抱岳陽樓四年風露侵遊子十月江湖吐亂洲
未必上流須魯肅腐儒空白九分頭

再登岳陽樓感慨賦詩

岳陽壯觀天下傳樓陰背日隄
繇繇草木相連南服內
江湖異態闌干前乾坤萬事集
雙鬢臣子一謫今五年
欲題文字弔今古風壯浪湧心
茫然

除夜

城中爆竹已殘更朔吹翻江意
未平多事鬢毛隨節換
盡情燈火向人明比量舊歲聊
堪喜流轉殊方又可驚
明日岳陽樓上去島烟湖霧看
春生

火後問舍至城南有感

魂傷瓦礫舊曾遊尚想奔烟萬馬道
遂替他人作正月
絕知回路想已丘書生性命曾經試
客子茅茨費屢謀
惟有君山故窈窕一眉晴綠向人浮

望燕公樓下李花

燕公樓下繁華樹一日遙看一百迴
羽蓋夢餘當晝立
縞衣風急過牆來洛陽路不容春到
南國花應為客開
今日豈堪簪短髮感時傷舊意難裁

陪粹翁舉酒于君子亭下海棠方開

世故驅人殊未央聊從地主借繩牀
春風浩浩吹遊子暮雨霏霏濕海棠
去國衣冠無態度隔簾花葉有輝光
使君禮數能寬否酒味撩人我欲狂

春夜感懷寄席大光

管寧白帽且蹢躅孤鶴歸期難計年
倚杖東南觀百變傷心雲霧隔三川
江湖氣動春還冷鴻雁聲迴人不眠
苦憶西州老太守何時相伴一燈前

雨中對酒庭下海棠經雨不謝

巴陵二月客添衣
草草杯觴恨醉遲
燕子不禁連夜雨
海棠猶待老夫詩
天翻地覆傷春色
齒豁頭童祝聖時
白竹籬前湖海闊
茫茫身世兩堪悲

周尹潛以僕有郢州之命作詩見贈有橫槊之句
次韻謝之

一歲憂兵四閱時
偷生不恨隙駒馳
如何南紀持竿手
卻把西州破賊旗
儻有青油盛快士
何妨畫戟入新詩

因君調我還增氣男子平生竟要奇

次韻尹潛感懷

北兵又看繞淮春歎息猶爲國有人可使翠華周寓縣
誰持白羽靜風塵五年天地無窮事萬里江湖見在身
共說金陵龍虎氣放臣迷路感烟津

贈傅子文

漁子牧兒談笑新先生勝日步湖濬沙邊忽見長身士
頭上仍欹折角巾豺虎不能寬遠俗山川終要識詩人

蘆叢如畫斜陽裏拄杖相尋無雜賓

江行野宿寄大光

檣烏送我入蠻鄉天地無情白髮長
萬里回頭看北斗三更不睡聽鳴榔
平生正出元子下此去還經思贛旁
投老相逢難衮衮共恢詩律撼瀟湘

寄信道

衡山未見意如飛浩蕩風帆不可期
卻憶府中三語掾空吟江上四愁詩
高難落日光零亂遠岸叢梅雪陸離

賸欲平生持寄子白頭才盡只成悲

衡岳

野客原耕蒿岳田得遊衡岳是前緣
避兵徑度吾豈忍欲雨還休神所憐
世亂不妨松偃蹇村空更覺水潺湲
非無拄杖終傷老負此名山四十年

簡齋集卷十一

欽定四庫全書

簡齋集卷十二

宋 陳與義 撰

七言律詩

元日

五年元日只流離
楚俗今年事事非
後飲屠蘇驚已老
長乘舴艋竟安歸
攜家作客真無策
學道剗心卻自違
汀草岸花知節序
一身千恨獨霑衣

先寄邢子友

作客經年樂有餘
邵陽岐路不崎嶇
山川好處歌紗帽
桃李香中度筍輿
欲見舊文驚歲月
剩排幽語說艱虞
人間書疏非吾事
一首新詩未可無

立春日雨

衡山縣下春日雨
遠映青山綠樣斜
容易江邊欺客袂
分明沙際濕年華
竹林路隔生新水
古渡船空集亂鴉
未暇獨憂巾一角
西溪當有續開花

山中

當復入州寬作期人間踏地有安危風流丘壑真吾事
籌策廟堂非所知白水春陂天淡淡蒼峯晴雪錦離離
恰逢居士身輕日正是山中多景時

三月二十日聞德音寄李德升席大光新有召命
皆寓永州

塵隔斗牛三月餘德音再與萬方初又蒙天地寬今歲
且掃軒牕讀我書自古安危關政事隨時憂喜到樵漁

零陵併起扶顛手九廟無歸計莫疎

題東家壁

斜陽步屨過東家便置清尊不煮茶
高柳光陰初罷絮嫩龜毛羽欲成花
羣公天上分時棟間客江邊管物華
醉裏吟詩空跌宕借君素壁落棲鴉

散髮

百年如寄亦何為散髮清狂未足非
南澗題詩風滿面東橋行樂露霑衣
松花照夏山無暑桂樹留人吾豈歸

藜杖不當軒蓋用，穩扶居士莫相違。

觀雨

山客龍鍾不解耕，開軒危坐看陰晴。
前江後嶺通雲氣，萬壑千林送雨聲。
梅壓竹枝低復舉，風吹山角晦還明。
不嫌屋漏無乾處，正要羣龍洗甲兵。

寄德升大光

君王憂詔起羣公，也寘樵夫尺一中。
易著青衫隨世事，難將白髮犯秋風。
共談太極非無意，能繫蒼生本不同。

卻倚紫陽千丈巔遙瞻黃鵠九霄東

次韻邢九思

百年鼎鼎雜悲歡老去初依六祖壇
玄晏不堪長抱病子真那復更為官
山林未必容身得顏面何宜與世看
白帝高尋最奇事共君盟了不應寒

題道州甘泉書院

甘泉坊裏林影黑吳氏舍前書牒鮮
牀座略容摩詰借桂枝應待小山傳
兵橫海內猶紛若風到湖南還穆然

勉效周生述孔紫賦詩吾獨媿先賢

度嶺

年律將窮天地溫兩州風氣此橫分已吟子美湖南句
更擬東坡嶺外文隔水叢梅疑是雪近人孤嶂欲生雲
不愁去路三千里少住林間看夕曛

次韻謝呂居仁居仁時寓賀州

別君不覺歲時荒豈意相逢魑魅鄉篋裏詩書總寥落
天涯形貌各昂藏江南今歲無征戰嶺表窮冬有雪霜

儻可卜鄰我欲住草茅為葢竹為梁

舟行遣興

會稽尚隔三千里臨賀初盤一百灘殊俗問津言語異
長年為客路岐難背人山嶺重重去照鷁梅花樹樹殘
酌酒柁樓今日意題詩船壁後來看

康州小舫與耿伯順李德升席大光鄭德象夜語
以更長愛燭紅為韻得更字

萬里衣冠京國舊一船風雨晉康城燈前顏面重相識

海內艱難各飽更天闊路長吾欲老夜闌酒盡意難傾
明朝古峽蒼烟道都送新愁入櫓聲

與大光同登封州小閣

去程欲數莽難知三日封州更作遲青嶂足稽天下士
錦囊今有嶠南詩共登小閣春風裏回望中原夕靄時
萬本梅花為我壽一杯相屬未全癡

雨中再賦海山樓

百尺闌干橫海立一年襟抱與山開岸邊天影隨潮入

樓上春容帶雨來，慷慨賦詩還自恨。
徘徊舒嘯卻生哀，世間猛士今安在？
非復當年單父臺。

贈漳州守綦叔厚

過盡蠻荒興復新，漳州畫戟擁詩人。
十年去國九行旅，萬里逢公一欠伸。
王粲登樓還感慨，紀瞻赴召欲逡巡。
繩牀相對有今日，賸醉齋中軟腳春。

自黃巖縣舟行入台州

宴坐峯前衝雨急，黃巖縣裏借舟遲。
百年凝點不相補。

萬事悲歡豈可期
莽莽蒼波兼宿霧
紛紛白鷺落山陂
只應江海淒涼地
欠我臨風一賦詩

送熊博士赴瑞安令

衣冠衮衮相逢處
草木蕭蕭未變時
聚散同驚一枕夢
悲歡各誦十年詩
山林有約吾當去
天地無情子亦飢
笑領銅章非失計
歲寒心事欲深期

醉中

醉中今古興衰事
詩裏江湖搖落時
兩手尚堪杯酒用

寸心惟是鬢毛知稽山擁郭東西去禹穴生雲朝暮奇
萬里南征無賦筆茫茫遠望不勝悲

懷天經智老因訪之

今年二月凍初融睡起茗溪綠向東客子光陰詩卷裏
杏花消息雨聲中西菴禪伯還多病北柵儒先只固窮
忽憶輕舟尋二子綸巾鶴氅試春風

和孫升之

姬國餘芳代有人于今公子秀溪濱處心如水尚書市

能賦臨流靖節君
花島紅雲春句麗
月梅疎影異香聞
囊開古錦湖山出
何意一星窺妙文
此和升之咏周堅仲十二年前刊周

子壁間有詩曾見之故
有一星窺妙文之句

寺居

招提遠占一牛鳴
阻絕干戈得暫經
夢境了知非有實
醉鄉不入自常醒
樓臺近水涵明鑑
草樹連空寫素屏
物象自堪供客眼
未須覓句戶長扃

與義竊慕東坡以鐵拄杖為樂
全生日之壽今以

大銅瓶上判府待制庶幾因物以露區區且作詩
二首將之亦東坡故事

要學東坡壽樂全此瓶端合供儒先鐵如意畔無憂畏
玉唾壺旁耐歲年項似董宣真是強腹如邊孝故應便
與公剩貯烏霖水不羨宮門承露仙

不與觀音伴柳枝要令奇相解公頤會逢白氏編書日
猶夢陶家貯粟時安用作盤供歃血也勝為鉢困催詩
千年秀結重重綠長映先生鬢與眉

又用韻春雪

急雪催詩興未闌東風肯奈烏烏寒最憐度牖勤勤意
更接飛花細細看連夜拋回三白瑞及時驚動五辛盤
袁安久絕千人望春破還思綺一端

次韻邢子友

壯士如今爛莫收尚思抽矢射旄頭不堪苦霧侵衰鬢
稍喜和烟入戍樓萬里中原空費夢三春勝日偶成遊
青松遠嶺偏驚眼薄晚闌干更少留

余識景純家弟出其詩見示喜其同臭味也輒用
大成黃字韻賦八句贈之

阿奴喜氣照人黃傳得新詩細作行可愛懸知似楊柳
忘憂不復待檳榔魏收已獲崔昂譽摩詰仍推相國長
曷不少留東閣醉剩收篇詠作歸裝

次韻景純道中寄大成

聞道歌行伏李紳古來賢守是詩人久欽樂廣懷披霧
一見周瑜勝飲醇海內期公黃閣老尊前容我白綸巾

佳篇咀嚼真堪飽此日何憂甑有塵

景純再示佳什殆無遺巧勉成二章一以報佳貺

一以自貽

睨睨休嫌笏與紳如公本是九包人

來詩云還山終戴鹿皮巾讀書

只用三冬足學道從來一色醇太尉談辭揮玉麈侍中風韻更紗巾誰言上界多官府亦許散仙追後塵

諸公衮衮坐垂紳誰信北風欺得人遮眼讀書何用解

發顏要酒可須醇

文選醇醴發顏

十年白社空看鏡萬里青天

一岸巾少待奇章到三日試將冠蓋拂埃塵

次韻家弟所賦

曹劉方駕信優為不廢東郊坐保釐投蚓問公逢老手
聯珠及我媿連枝定知來者傾三歎共了流年費幾詩
瘀絮車斜敢將去樂天那畏一微之

次韻宋主簿

九折灣中萬斛舟怪公隨處得心休未應菊徑關心急
聊爲魚槎盡意留陸子舊蹤餘馬頂羊公遺碣見龜頭

遙知太白無多事醉裏詩成不待搜

用大成四桂坊韻贈令狐昆仲

鄉人洗眼看銀黃得桂連枝手尚香盛事固應傳雁塔
新詩不減住雞坊醞酥乳酪原同味羯末封胡更合堂
從此葛恢門下客知名可但一揚方

陳叔易學士母阮氏挽詞二章


典刑奕奕照來今鶴髮魚軒汝水潯避地梁鴻不偕老
弄烏菜子若爲心送喪忽見三千乘奉祝那聞五百金

婦德母儀俱不媿碑銘知己託張林

去年披霧識儒先欲拜萱堂未敢前
盧壺要傳紗幔業王哀忽廢蓼莪篇
秀眉隔夢黃墟裏落日驅風丹旆邊
佛子歸真定何處空令苦淚漲黃泉

侯處士女挽詞

疇昔翁才比太師固應生女作門楣
人門似夢風旌出佛子何之宰樹悲
五百祝金空總帳三千車乘忽荒陂
他年不共江流去突兀張林婦德碑



簡齋集卷十二

欽定四庫全書

集部

簡齋集卷十三至

六

詳校官庶吉士_臣翁樹培

侍讀_臣孫球覆勘

總校官編修_臣王燕緒

校對官中書_臣石鴻翥

謄錄監生_臣王永鎮

謄錄監生_臣沈錫爵

欽定四庫全書

簡齋集卷十三

宋 陳與義 撰

五言長律

道中書事

臨老傷行役，籃輿歲月奔。
客愁無處避，世事不堪論。
白道含秋色，青山帶雨痕。
壞梁斜闌水，喬木密藏村。
易破還家夢，難招去國魂。
一身從白首，隨意答乾坤。

感事

喪亂那堪說干戈竟未休公卿危北顧江漢故東流風
斷黃龍府雲移白鷺洲云何舒國步持底副君憂世事
非難料吾生本自浮菊花紛四野作意為誰秋

晚晴野望

洞庭微雨後涼氣入綸巾水底歸雲亂蘆叢返照新遙
汀橫薄暮獨鳥度長津兵甲無歸日江湖送老身悠悠
只倚杖悄悄自傷神天意蒼茫東村醪亦醉人

五言絕句

同家弟賦蠟梅詩得四絕句

朱朱與白白著意待春開
那知洞房裏已傍額黃來
韻勝誰能舍色莊
那得親朝陽一映樹到骨不留塵
黃羅作廣袂絳紗作中單
人間誰敢著留得護春寒
一花香十里更值滿枝開
承恩不在貌誰敢鬪香來

蠟梅四句

花房小如許銅翦黃金塗
中有萬斛香與君細細輸

來從底處所黃露滿衣濕緣慙翻得憐亭亭倚風立
奕奕金仙面排行立曉晴殷勤夜來雪少住作珠璣
亭亭金步搖朝日明漢宮當時好光景一似此園中

題持約畫軸

日落川更闊烟生山欲浮舟中有閒地載我得同遊
梅花兩絕句

客行滿山雪香處是梅花丁寧明月夜認取影橫斜
曉天青脈脈玉面立疎籬山中爾許樹獨自費人詩

正月十六日夜二絕

正月十六夜竹籬田父家明月照樹影滿山如龍蛇
二更風薄竹悲吟連夜分村西迅餘韻應勝此間聞

出山二首

陰巖不知晴路轉見朝日獨行脩竹盡石崖千丈碧
山空樵斧響隔嶺有人家日落潭照樹川明風動花

入山二首

出山復入山路隨溪水轉東風不惜花一暮都開徧

都迷去時路策杖烟漫漫微雨洗春色諸峯生晚寒

與夏志宏孫信道張巨山同集澗邊以散髮巖岫

為韻賦四小詩

哦詩谷虛響微步下巖半披叢澗影搖集鳥紛然散

亂石披沙淺水紋如紺髮馳暉忽西沒林光相映發

舉頭山圍天濯足樹映潭山中記今日四士集空巖

張子卧石榻夏子理泉竇孫子獨不言搢頤數烟岫

衡岳二首

城中望衡山浮雲作飛蓋
竭來巖谷遊卻在浮雲外
危亭見上方林壑帶殘陽
今日豈無恨重遊卻味長

絕句

野鴨飛無數桃花濕滿枝
竹輿鳴細雨山客有新詩

九日示大圓洪智

自得休心法悠然不賦詩
忽逢重九日無耐菊花枝

九月八日戲作兩絕句示妻子

今夕知何夕都如未病時
重陽莫草草剩作幾篇詩

小甕今朝熟無勞問酒家重陽明日是何處有黃花

六言絕句

六言二首

莫賦澗松鬱鬱但吟陂麥青青為婦讀劉伶傳教兒書
甯戚經

種竹可侔千戶擁書不假百城何必思之爛熟熟官無
用分明

題顏持約畫水墨梅花

未央宮裏紅杏羯鼓三聲打開大庾嶺頭梅萼管城呼
上屏來

不見梅花

荆楚歲時經盡今年不見梅花想得蒼烟玉立都藏江
上人家

七言絕句

襄邑道中

飛花兩岸照船紅百里榆隄半日風卧看滿天雲不動

不知雲與我俱東

和張矩臣水墨梅五絕

巧

一作刻

畫無鹽醜不除此花風韻更清姝從教變白能

為黑桃李依然是僕奴

病見昏花已數年只應梅藥故依然誰教也作陳玄面
眼亂初逢未敢憐

粲粲江南萬玉妃別來幾度見春歸相逢京洛渾依舊
惟恨緇塵染素衣

舍章簷下春風面造化功成秋兔毫意足不求顏色似
前身相馬九方臯

自讀西湖處士詩年年臨水看幽姿晴牕畫出橫斜影
絕勝前村夜雪時

梅花

高花玉質照窮臘破雪數枝春已多一時傾倒東風意
桃李爭春奈晚何

題畫兔

碎身鷹犬慙何忍埋骨詩書事亦微
霜落深林可終歲
雄雌暖日莫忘機

秋夜

中庭淡月照三更白露洗空河
漢明莫遣西風吹葉盡
卻愁無處著秋聲

跋外祖存誠子帖

亂眼龍蛇起平陸後身義獻已黃墟
客來空認袁公額
淚盡慙無楊惲書

詠蟹

量才不數蟹魚鱗四海神父顧長康但見橫行疑是躁
不知公子實無腸

中年道中二首

雨意欲成還未成歸雲卻作伴人行依然壞郭中年縣
千尺浮屠管送迎

楊柳招人不待媒蜻蜓匹馬忽相猜如何得與涼風約
不共塵沙一併來

清明二首

街頭女兒雙髻鴉
隨蜂趁蝶學天邪
東風也作清明節
開偏來禽一樹花

卷地風拋市井聲
病扶危坐了清明
一簾晚日看收盡
楊柳微風百媚生

春日二首

朝來庭樹有鳴禽
紅綠扶春上遠林
忽有好詩生眼底
安排句法已難尋

憶看梅雪縞中庭轉眼桃梢無數青萬事一身雙鬢髮
竹牀欹枕數牕櫺

柳絮

柳送腰肢日幾迴更教飛絮舞樓臺顛狂忽作高千丈
風力微時穩下來

秋試院將出書所寓牕

門前柿葉已堪書弄鏡燒香聊自娛百世牕明牕暗裏
題詩不用著工夫

秋日

琢句不成添鬢絲且搗筇杖看雲移
槐花落盡金林綠
光景渾如初夏時

次何文綬題顏持約畫水墨梅花韻二首

牕間光景晚來新半幅溪藤萬里春
從此不貪江路好
賸拋心力喚真真

奪得斜枝不放歸倚窻承月看煮微墨池雪嶺春俱好
付與詩人說是非

為陳介然題持約畫

層層水落白灘生
萬里征鴻小作程
日落微風過荷葉
陂南陂北聽秋聲

九日宜春苑午憩幕中聽大光誦宋迪功詩

酒酣耳熱不成歌
柰此一川黃菊何
卧聽西風吹好句
老天無恨幕生波

西省醑醺架上殘雪可愛戲同王元忠席大光賦

詩

酴醾花底當年事
夜雪模糊照酒闌
北省今朝枝上雪
還揩病眼作花看

寶園醉中前後五絕句

東風吹雨小寒生
楊柳飛花亂晚晴
客子從今無可恨
寶家園裏有鶯聲

海棠脈脈要詩催
日暮紫絲無數開
欲識此花奇絕處
明朝有雨試重來

不見海棠相似人
空題詩句滿花身
酒闌卻度荒陂去

驅使風光又一春

三月碧桃驚動人滿園光景一時新
勝傾老子尊中玉折盡繁枝不要春

一尊相屬莫辭空報答今朝吹面風
自唱新詩與明月碧桃開盡雨聲中

宴坐之地蘧蔭覆之名曰蓬齋

不口口口了三冬旋作蓬齋待朔風
會有打牕飛口口地爐孤坐策奇功

鄧州西軒書事十首

小儒避地南征日
皇帝行天第一春
走到鄧州無腳力
桃花初動雨留人

千里空攜一影來
白頭更著亂蟬催
書生身世今如此
倚徧周家十二槐

瓦屋三間寬有餘
可憐小陸不同居
易求蘇子六國印
難得河橋一字書

莫嫌啖蔗佳境遠
橄欖甜苦亦相并
都將壯節共辛苦

準擬殘年看太平

皇家卜年過周歷變故未必非天仁東南鬼火成何事
終待遘烽作爭臣

楊劉相傾建中亂不待白首今同歸只今將相須廉蔭
五月并門未解圍

不須夜夜看太白天地景氣今如斯始行螭蚌相攻策
可惜中原見事遲

詔書憂民十六事父老祝君一萬年白髮書生喜無寐

從今不仕可歸田

范公深憂天下日仁祖愛民全盛年遺廟只今香火冷
時時風葉一騷然

諸葛經行有夕風千古天地幾英雄
弔古不須多感慨
人生半夢半醒中

簡齋集卷十三

欽定四庫全書

簡齋集卷十四

宋 陳與義 撰

七言絕句

縱步至董氏園亭二首

槐葉層層新綠生
客懷依舊不能平
自移一榻西牕下
要近叢篁聽雨聲

客子今年駝褐寬
鄧州三月始春寒
簾鉤挂盡蒲團穩

十丈虛庭借雨看

香林四首

絕愛公家花氣新一林清露百般春是中宴坐應容我
只恐微風喚起人

丈人延客非俗物百和香中進一杯乞取齊奴錦步障
與春遮斷曉風來

誰見繁香度牖時碧天殘月映花枝故應撩我題新句
壓倒韋郎宴寢詩

簡齋居士不飲酒一入香林更不醒驅使小詩酬曉露
絕勝辛苦廣騷經

夏夜二首

虛庭散策晚涼生斟酌星河亦喜晴不記牆西有脩竹
夜風還作雨來聲

待到天宮放月時東家喬柏兩蚪枝懸知滿地疎陰處
不及遙看突兀奇

同繼祖民瞻遊賦詩亭二首

邂逅今朝一段奇從來華屋不關詩諸公且作留連意
正是微風到竹時

浩浩白雲溪一色冥冥青竹鳥三呼祇今那得王摩詰
畫我凭闌覓句圖

題繼祖蟠室三首

雲起鑪山久未移功名不恨十年遲日斜疎竹可牕影
正是幽人睡足時

萬卷吾今一字無打包借處野僧如短檠未盡殘年興

欲問班生借賜書

中興天子要人才當使生擒頡利來
正待吾曹紅抹額
不須辛苦學顏回

有感再賦

憶得甲辰重九日天恩曾預宴
城東龍沙此日西風冷
誰折黃花壽兩宮

坐澗邊石上

三面青山圍竹籬人間無路訪安危
扶筇共坐槎牙石

澗水悲鳴無歇時

採菖蒲

閑行澗底採菖蒲
千歲龍蛇抱石臞
明朝卻覓房州路
飛下山顛不要扶

晚望信道立竹林邊

脩竹林邊烟過遲
幅巾藜杖立疎籬
恨無顧陸同攜手
寫取孫郎覓句時

醉中至西徑梅花下已盛開

梅花亂發雨晴時
褪盡紅綃見玉肌
醉中忘卻頭邊雪
橫插繁枝歸竹籬

和王東卿絕句四首

少時走馬洛陽城
今作江邊瓶錫僧
說與虎頭須畫我
三更月裏影崢嶸

來日安榴花尚稀
壓牆丹實已垂垂
何時著我扁舟尾
滿袖西風信所之

只今當代功名手
不數平生粥飯僧
獨立江風吹短髮

暮雲千里倚峻嶒

平生不得吟詩力
空使秋霜入鬢垂
太岳峰前滿尊月
爲君聊復一中之

又登岳陽樓

岳陽樓前丹葉飛
闌干留我不思歸
洞庭鏡面平千里
卻要君山相發揮

除夜

萬里江湖憔悴身
蓼蓼街鼓不饒人
只愁一夜梅花老

看到天明付與春

火後借居君子亭書事四絕呈粹翁

天公惡劇逐翻新
賴是今年有主人
君子亭中眠白晝
燕公樓上眺青春

祝融回祿意佳哉
挽我梅花樹下來
一夜東風不知惜
月明滿樹十分開

斫竹和梢編作籬
微風如在竹林時
無人來訪龐居士
晚日疎陰光陸離

入山從此不須深
君子亭中人不尋
青竹短籬圍畫靜
梅花兩樹照春陰

用前韻再賦四首

西園芳氣雨餘新
喚起亭中入定人
爲報使君多釀酒
梅花落盡不關春

揚州雲氣鬱佳哉
百慮方橫吉語來
卻看詩書安穩在
竹籬陰裏得時開

危樓只隔一重籬
誰見扶筇獨上時
如許江山嬾搜句

燕公應笑我支離

欲識道人門徑深水仙多處試來尋青棠素面天應惜
乞與西園十日陰

二十一日風甚明日梅花無在者獨紅萼留枝間
可愛

昨日梅花猶可攀今朝殘萼便爛斑羣仙已御東風去
總脫絳袂留林間

春寒

二月巴陵日日風春寒未了怯園公海棠不惜胭脂色
獨立濛濛細雨中

次韻傅子文絕句

風雨門前十日泥荒街相伴只筇枝從今老子都無事
落盡園花不賦詩

周尹潛雪中過門不我顧遂登西樓賦詩見寄次
韻謝之三首

晴牕飛雪偃幽聽起覓新詩自啓扃不覺高軒牆外過

貪看萬鶴舞中庭

堪笑臞仙也耐寒
飛花端合上樓看
深知壯觀增詩律
洗盡元和到建安

敲門俗子令我病
面有三寸康衢埃
風饕雪虐君馳去
蓬戶那無酒一杯

城上晚思

獨凭危堞望蒼梧
落日君山如畫圖
無數柳花飛滿岸
晚風吹過洞庭湖

尋詩兩絕句

楚酒困人三日醉園花經雨百般紅無人畫出陳居士
亭角尋詩滿袖風

愛把山瓢莫笑儂愁時引睡有奇功醒來推戶尋詩去
喬木崢嶸明月中

五月二日避貴寇入洞庭湖絕句

鼓發嘉魚千面雷亂帆和雨向湖開何妨南北東西客
一聽湘妃瑤瑟來

雨中

雨打船篷聲百般
白頭當夏不禁寒
五湖七澤經行徧
終憶吾鄉八節灘

閏八月十二日過哥父共坐翠竇軒賞木犀花玲瓏滿枝光氣動人念風日不貸此花無五日香矣而王使君未之知作小詩報之

清露香浮黃玉枝
使君未到意低迷
極知有日交銅虎
可使無情向木犀

再賦二首呈奇父

國香熏坐先生醉秋葉藏花客子迷
馳使晚風同勝地
東軒不用鎮帷屏

香過東園花一枝尋花覓路忽成迷
先生莫謂心如鐵
喜氣朝來橫角犀

十三日再賦二首其一以贊使君是日對花賦此
韻詩落筆縱橫而郡中修水戰之具方大閱于燕
公樓下也其一自敘所感憶年十五在杭州始識

此花皆三丈高未嘗賦詩

我丈風流元祐枝晴軒雨電筆端迷從容文武一時了
賦罷木犀觀水犀

武林曾識最高枝百感重逢歲月迷向日擘牋須彩鳳
如今執盾要文犀

兩絕句

西風吹日弄晴陰酒罷三更湖海深岳陽樓上登高節
不負南來萬里心

二士相隨風滿巾
兩禪同隊景彌新
但得黃花不牢落
莫嫌驚倒岳州人

初識茶花

伊軋籃輿不受催
湖南秋色更佳哉
青裙玉面初相識
九月茶花滿路開

衡岳

客子山行不覺風
龍吟虎嘯滿山松
綸巾一幅無人識
勝業門前聽午鍾

跋江都王畫馬

天上房星空不動人間畫馬亦難逢當年筆下千金鹿
此日牕間八尺龍

與王子煥席大光同遊廖園

三枝筇竹興還新王丈席兄俱可人僑立司州溪水上
吟詩把酒對青春

除夜次大光韻大光是夕婚

一杯節酒莫留殘坐看新年上鬢端只恐梅花明日老

夜瓶相對不知寒

除夜不寐飲酒一杯明日示大光

萬里鄉山路不通年年佳節百憂中催成客睡須春酒

老

案此下
原本缺

甘棠道中

筍輿礙石一悠然正月微風意已便桃花向來渾不數

山中時見絕堪憐

將至杉木鋪望野人居

春風漠漠野人居若使能詩我不如數株蒼檜遮官道
一樹桃花映草廬

羅江二絕

荒村終日水車鳴陂北陂南共一聲洒面風吹作飛雨
老夫詩到此間成

山翁見客亦欣然好語重重意不傳行過竹籬逢細雨
眼明雙鷺立青田

題水西周三十三壁二首

下管先生巾欲摧雨中艇子便撐開青山隔岸迎人去
白鷺衝烟送酒來

周子簞中早得春喚人同度一溪雲貪看雨歇前峯變
不覺斟時已十分

簡齋集卷十四

欽定四庫全書

簡齋集卷十五

宋 陳與義 撰

七言絕句

寄大光二絕句

心折零陵霜入鬢更修短札問何如江湖不是無來雁
只慣平生作報書

芭蕉急雨三更鬧客子殊方五月寒近得會稽消息否

稍傳荆渚路岐寬

村景

黃昏吹角聞呼鬼
清曉持竿看牧鵝
蠶上樓時桑葉少
水鳴車處稻苗多

偶成

諫議遺蹤尚可望
曳裾不必效鄒陽
但修天爵要人爵
始信書堂即玉堂

水車

江邊終日水車鳴我自生平愛此聲風月一時都屬客
杖藜聊復寄詩情

山居二首

點檢行年書閱閱山中共賦幾篇詩如今未有驚人句
更待秋風生桂枝

宅圖不必煩秋令已卜東坡澗水邊更與我為燒藥竈
只愁君要買山錢

拜詔

紫陽山下聞皇牒
地藏階前拜詔書
乍脫綠袍山色翠
新披紫綬佩金魚

別諸州二首

風送孤蓬不可遮
山中城裏總非家
臨行有恨君知否
不見籬前稻著花

隴雲知我欲船開
飛過江東還復回
不似周顒趨闕去
山靈應許卻歸來

題向伯恭過峽圖二首

旌旗翻日淮南道興罷歸來雪滿船正有佛光無處著
獨將佳句了山川

過峽新圖世所傳峽中尤說泛舟仙柱天勲業須君子
借我茅齋看十年

題趙少尹青白堂三首

小謝為州不廢詩庭中草木有光輝一林風露非人世
更著梅花相發揮

使君堂上無俗客白白青青雨勝流添得吟詩老居士

千年一笈澤南州

雪裏芭蕉摩詰畫炎天梅蘂簡齋詩
他時相見非生客
看倚琅玕一段奇

石限病起

幽人病起山深處小院鴉鳴日午時
六尺屏風遮宴坐
一簾細雨獨題詩

戲大光送酒

折得嶺頭如玉梅對花那得欠清杯
不煩白水真人力

便有青州從事來

次韻大光五羊待耿伯順之作

康州艇子來不急
過岸櫓聲空復長
百尺樓頭堪望遠
淡烟斜日晚荒荒

和大光道中絕句

已費天公十日晴
今朝小雨送潮生
轉頭雲日還如錦
一抹葱瓏畫不成

又和大光

寂寂孤村竹映沙
檳榔迎客當煎茶
嶺南二月無桃李
夾路松開黃玉花

雨中宿靈峯寺

雁蕩山中逢晚雨
靈峯寺裏借繩牀
只應護得綸巾角
還費高僧一炷香

王孫嶺

已過長溪嶺更危
伏龍莽莽向川垂
斜陽照見林中石
記得南山隱去時

梅花二首

鐵面蒼髯洛陽客
玉顏紅頰會稽仙
街頭相見如相識
恨滿東風意不傳

畫取維摩室中物
小瓶春色一枝斜
夢回映月牕間見
不是桃花與李花

題伯時畫溫溪心等貢五馬

漠漠河西塵幾重
年年畫馬亦難逢
題詩記著今朝事
回看聯翩五匹龍

題畫

分明樓閣是龍門亦有溪流曲抱村
萬里家山無路入
十年心事與誰論

題崇蘭圖二首

兩公得我色敷腴藜杖相將入畫圖
我已夢中多識路
秋風舉袂不知躑

變變天氣吹角巾松聲水色一時新
山林從此不牢落
照影溪頭共六人

與智老天經夜坐

殘年不復徙他鄉
長與兩禪同夜釭
坐到更深都寂寂
雪花無數落天牕

觀雪

無住菴前境界新
瓊樓玉宇總無塵
開門倚杖移時立
我是人間富貴人

題俞秀才所藏江參山水橫軸二首

卷中衮衮溪山出
筆下明明開闢初
不肯一禪為婦計

俞卽作意未全疎

萬壑分烟高復低人家隨處有柴扉
此中只欠陳居士
千仞岡頭一振衣

梅花

一枝斜映佛前燈
春入銅壺夜不冰
昔歲曾遊大庾嶺
今年聊作小乘僧

櫻桃

四月江南黃鳥肥
櫻桃滿市粲朝暉
赤英盤裏雖殊遇

何似筠籠相發揮

葉枏惠花

無主巷中老居士逢春入定不銜杯文殊

闕字

俱拱手

今日花枝喚得回

牡丹

一自邊塵入漢關十年伊洛路漫漫青墩溪畔龍鍾客
獨立東風看牡丹

盆池

三尺清池牕外開
蒹葭底戲魚回
雨聲轉入浙江去
雲影還從震澤來

松棚

黯黯當牕雲不驅
不教風日到琴書
只今老子風流地
何似茅山陶隱居

玉堂瀑直

庭葉瓏瓏曉更青
斷雲度日照寒廳
只應未上歸田奏
貪誦楞伽四卷經

晨起

寂寂東軒晨起遲
朦朧草木暗疎籬
風來衆綠一時動
正是先生睡足時

芙蓉

白髮颼蕭一病翁
暮年身世藥瓢中
芙蓉牆外垂垂發
九月憑闌未怯風

微雨中賞月桂獨酌

人間跌宕簡齋老
天下風流月桂花
一壺不覺叢邊盡

暮雨霏霏欲濕鴉

畫梅

蛾眉淡淡自成妝
驛使還家空斷腸
脂粉不施憔悴盡
失身未嫁易元光

竹

高枝已約風為友
密葉能留雪作花
昨夜常娥更瀟灑
又攜疎影過牕紗

長沙寺桂花重開

天遣幽花兩度開
黃昏梵放此徘徊
不教居士卧禪榻
喚出西廂共看來

和若拙弟得陪遊後園二首

西園冠蓋坐生風
更欲長繩繫六龍
惟有病夫能省事
北牕三友是過從

壯夫三箭功名手
儒士百篇藜莧腸
莫道人握珠玉
應須字字挾風霜

季高送酒

自接麴生蓬戶外便呼伯雅竹牀頭
真逢幼婦著黃絹直遣從事到青州

墨戲二首

鄂州遷客一花說仇池老仙五字銘
併入晴牕三昧手不須辛苦讀騷經

右蘭

人間風露不到畹只有酪奴無世塵
何須更待秋風至蕭艾從來不共春

右蕙

上知府用家弟韻

萬里平生幾蛇足九州何路不羊腸只應綠士蒼官輩
卻解從公到雪霜

與義以雨有嘉應遂占有秋輒採用家弟韻賦二

絕句少資勤恤之誠也

按此二絕句當亦是上知府之作而編錄者缺書

雲氣初看龍起湫雨聲旋聽樹驚秋已教農父歌田守

更遣虞人信魏侯

比蒙宿戒遊富家池明日微雨猶不廢出故有是句

紀德刊碑不厭豐
龍眠深洞一言通
坐看綠浪搖千里
拔薤栽榆未當功

梅

愛歌纖影上牕紗
無限輕香夜遶家
一陣東風濕殘雪
強將嬌淚學梨花

送人歸京師

門外子規啼未休
山村日落夢悠悠
故園便是無兵馬
猶有歸時一段愁

賦康平老銅雀硯

鄴城臺殿已荒涼
依舊山河滿夕陽
瓦礫卻饒今日硯
似教人世寫興亡

和顏持約

半篙寒碧秋垂釣
一笛西風夜倚樓
多少巫山舊家事
老來分付水東流

早行

露侵駝褐曉寒輕
星斗闌干分外明
寂寞小橋和夢過

欽定四庫全書

卷十五

稻田深處野蟲鳴

簡齋集卷十五

欽定四庫全書

簡齋集卷十六

宋 陳與義 撰

無住詞

法駕導引

世傳頃年都下市肆中有道人攜烏衣椎髻女子買斗酒獨飲女子歌詞以侑凡九闋皆非人世語或記之以問一道士道士驚曰此赤城韓

夫人所製水府蔡真君法駕導引也烏衣女子
疑龍云得其三而亡其二擬作三闋

朝元路朝元路同駕玉華君千乘載花紅一色人間遙
指是祥雲回望海光新

東風起東風起海上百花搖十八風鬟雲半動飛花和
雨著輕綃歸路碧迢迢

簾漠漠簾漠漠天澹一簾秋自洗玉舟斟白醴月華微
映是空舟歌罷海西流

虞美人

亭下桃花盛開作長短句詠之

十年花底承朝露看到江南樹洛陽城裏又東風未必
桃花得似舊時紅 胭脂睡起春纔好應恨人空老心
情雖在只吟詩白髮劉郎孤負可憐枝

憶秦娥

五日移舟明山下作

魚龍舞湘君欲下瀟湘浦瀟湘浦興亡離合亂波平楚

獨無尊酒酬端午移舟來聽明山雨明山雨白頭孤
客洞庭懷古

臨江仙

前題

高詠楚詞酬午日天涯節序忽忽榴花不似舞裙紅無
人知此意歌罷滿簾風萬事一身傷老矣戎葵凝笑
牆東酒杯深淺去年同試澆橋下水今夕到湘中

虞美人

大光祖席醉中賦長短句

張帆欲去仍搔首更醉君家酒吟詩日日待春風及至
桃花開後卻忽忽歌聲頻為行人咽記著尊前雪明
朝酒醒大江流滿載一船離恨向衡州

點絳脣

紫陽寒食

寒食今年紫陽山下蠻江左竹離烟鎖何處求新火
不解鄉音只怕人嫌我愁無那短歌誰和風動梨花朵

虞美人

邢子友會上

超然堂上閒賓主不愛人間暑永盤圍坐此州無卻有
一瓶和露玉芙蓉 亭亭風骨涼生牖消盡尊中酒酒
闌明月轉城西照見紗巾藜杖帶香歸

漁家傲

福建道中

今日山頭雲欲舉青蛟素鳳移時舞行到石橋聞細雨

聽還住風吹卻過溪西去
我欲尋詩寬久旅桃花落
盡春無所渺渺籃輿穿翠楚
悠然處高林忽送黃鸝語

虞美人

予甲寅歲自春官出守湖州秋抄道中荷花無
復存者乙卯歲自瑣闥以病得請奉祠卜居青
墩鎮立秋後三日行舟之前後如朝霞相映望
之不斷也以長短句記之

扁舟三日秋塘路平度荷花去病夫因病得來遊更值

滿川微雨洗新秋 去年長恨拏舟晚空見殘荷滿今
年何以報君恩一路繁花相送到青墩

浣溪沙

離杭日梁仲謀惠酒極清而美七月十二日晚
卧小閣已而月上獨酌

送了棲鴉復暮鐘闌干生影曲屏東卧看孤鶴駕天風
起舞一尊明月下秋空如水酒如空謫仙已去與誰

同

玉樓春

青墩僧舍作

山人本合居巖嶺
聊問支郎分半境
殘年藜杖與綸巾
八尺庭中時弄影
呼兒汲水添茶鼎
甘勝吳山山下井
一甌清露一爐雲
偏覺平生今日永

清平樂

木犀

黃衫相倚翠葆層層底
八月江南風日美
弄影山腰水

尾 楚人未識孤妍離騷遺恨千年無住菴中新事一枝喚起幽禪

定風波

重陽

九日登高有故常隨晴隨雨一傳觴多病題詩無好句
孤負黃花今日十分黃 記得眉山文翰老曾道四時
佳節是重陽江海滿前懷古意誰會闌干三撫獨淒涼
菩薩蠻

荷花

南軒面對芙蓉浦
宜風宜月還宜雨
紅少綠多時
簾前光景奇
繩牀烏木几
盡日繁香裏
睡起一篇新
與花為主

南柯子

塔院僧閣

矯矯千年鶴
茫茫萬里風
闌干三面看
秋空背插浮屠
千尺冷烟中
林塢村村暗
溪流處處通
此間何似玉

霄峯遙望蓬萊依約曉雲東

臨江仙

夜登小閣憶洛中舊遊

憶昔午橋橋上飲坐中多是豪英長溝流月去無聲
杏花疎影裏吹笛到天明二十餘年如一夢此身雖在
堪驚閒登小閣看新晴古今多少事漁唱起三更

簡齋集卷十六